



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 7

Yangia anidakangma :

f Tir Yimyim

tirymyim@aolima

tir yimyim

TAPAK 9

Taoba CEC Sunil Arora Goa nung
Governor shimtsü akok

Minister Himanta-i Bihu
committee tem amokmeren

VOL. XVIII NO. 183 (ADOK 183) DIMAPUR

AMUNGNÜ (SUNDAY)

RONGCHII (APRIL) 18, 2021

₹ 5.00

Chief Secretary-i NIDA den senden amen

Dimapur, April 17 (TYO): Honibarnü Nagaland Chief Secretary-i anir tongti ketdangsürtemi Nagaland In-service Doctors' Association (NIDA) den senden menogo.

Senden nung doctor tem mapa nungi sodi angutsü indang arishi küm tasazük aser iba atema NIDA-i lungkak aitba onüktem benoka lemsatep.

April 10, 2021 nü Chief

Secretary-i NIDA dang Nagaland nung COVID wara dak rangloker lungkak maittsü mepishiba tanü-a paisa lepsia metetdaksü.

Sorkari medical doctor tem indang 'superannuation age' ajungkettsü atema jembidar aser iba onük ya küm ka tsüngda angatetteptsü, ta Nagaland Chief Secretary-isa NIDA dang metetdaksü.

Nagaland nung African Swine Fever putet

Dimapur, April 17 (TYO): Nagaland state nunga African Swine Fever (ASF) wara agi tonga lir, ta Department of Animal Husbandry & Veterinary Services-i metetdaksüogo.

Phek aser Kiphire district tem nungi sample bendener National Institute of High Security Animal Disease, Bhopal nung RTPCR test agidang iba osang jangjaogo, ta parnoki ashi.

Pei temeket nung ak asüba osang tekaratiba nung Veterinary Institute nem sangokjang, ta department-isa metetdaksü.

India sorkari National Action Plan nung lateta aliba ama inyaksü atema Department of

Animal Husbandry & Veterinary Services aser Environment, Forest & Climate Change for Sero-surveillance, Control, Containment & Eradication atema ak asüba osang sangoktsütsü parnokisa nenshia metetdaksü.

Iba wara ya "The Prevention and Control of Infectious and Contagious Disease in Animal Act, 2009" nung aliba ama osang sangoktsür.

Phek aser Kiphire district tem nung wara adokdak nungi kilometer 1 telongtet Infected Zone (IZ) aser kilometer 10 telongtet Surveillance Zone ta department-isa sangoktsüogo.

Dimapur nung tanur tetsür ka sosettsü merang

Dimapur, April 17 (TYO): Honibar anüngdang Dimapur nung tanur tetsür kati azük nungi pungzüka asütsü merang.

Dimapur kübok St Mary's Montessori Higher Secondary School anasa ki ka azük nungi tanutsüla jagi pungzü. Ajisiüaka, tia kaa la ali matongdang tom nung cable wires nung temdaker ang tsük, ta Dimapur Police-i ashi.

Iba lendong sülen la Dimapur nung mozü ki kati anir oa anepaludar aser la tasütsüasabo meyiru ta osang angazüker.

Tanutsüla jagi tatidang nung tamakok anguba agi azük nungi pungzüka asütsü molungtet, ta Dimapur Police-isa metetdaksü.

Honibarnü social media sabang balala nung tanutsüla ki azük nungi pungzüka indang video ka kanga prokshio.

Asür Prince Philip den asüpila sentong agiogo

Windsor, April 17 (Agencies): Honibarnü asür Prince Philip indang mang St. George's Chapel nung aliba Royal Vault nung enoka yuogo.

Iba Royal Vault nung England chuba asem dena tasümgang 24 yua lir. Tanü Prince Philip indang mang iba tesem nung ayu saka pa kinungtsü Queen Elizabeth II asüba sülen tena indang mang Frogmore Estate nung aliba Royal Burial Ground nung külemi aremtsü.

Tanü Land Rover gari ka nung asür Philip indang tasümgang süngden St. George's Chapel-i bener aru. Pa den asüpila sentep sentong agibaji tanü alima ajungalen live sayua liasü.

Honibarnü Queen Elizabeth II-i anir Britain nung alirtemi minute ka ola madoki asür Prince Philip nem tetushi agüja liasü.

Britain Chubatsür indang kinungbo ka ama mapang talangtuba yaritepa arubaji Prince Philip liasü. 1952 nung Queen Elizabeth II-i Britain madak yimsütsü tenzükdang nungi pai la yaria aruogo.

"Tena kibong kümer küm 73 sülen kübo asü aser iba ajanga kütsü taküm nung ongdang tulu ka adoktsüogo" ta tena jabaso Prince Andrew-i taoba hopta ashi.

Tanü Queen Elizabeth-i State Bentley gari nung mener St George's Chapel tashi la kinungbo mang meina ao.

Maneni, Prince Charles aser Princess Anne nati tetsüng agi tasümgang süngden abenba gari sülen anidak aser tena sülen Charles adianu- Edward o Andrew na den par jabaso William aser Harry nungertemi tetsüng agi mein.

Nagaland Governor-i Toppers aser Rank Holders den sensaksem



Dr. Imkongliba Hall, Raj Bhavan nung Nagaland Governor R.N. Ravi-i HSLC aser HSSLC 2020 nung Toppers aser Rank Holders den ajurutepa sensaksemba sentong nung agiba noksa angur. (Kohima, April 17)

Dimapur, April 17 (TYO): Nagaland Governor R.N. Ravi-i April 16 aser 17 anogotem HSLC aser HSSLC 2020 nung Toppers aser Rank Holders den ajurutepa sensaksemogo.

Iba sentong ya COVID-19 wara ajanga taoba mapang magitet liasü aser yashi o tanü Dr. Imkongliba Hall, Raj Bhavan, Kohima nung sentong ayonga agi.

"Lanurtem ya linük atema tarutsü lennirtem lir anungji nenoki alizüng tulu yuang, tasü itang aser meranga inyakang" ta Governor Ravi-i ashi.

Paisa kaketsirtem dang anogoshia mapang jungjunga

ketdangsütsü aser timi taküm alitsü ayongzü.

Governor-isa lanurtem dang social media nem manisadaksütsü atema kümdangtsü metetdaksü.

"Lanurtemi kaket azüngba yimya sübatsüla aser kaket zülur tajungtemi züluba kaketter azüngtsüla. Nenok ajemalua alitsüla aser nür tsüraburtem, tesayurtem aser adianutemi yariba pelaa agizütsüla. Nisung tajung ka asütsübaji kanga tongtipang aser na meimchir tajung ka mesüra ajak amajok dang asütsü" ta RN Ravi-isa metetdaksü.

Paisa NBSE Chairperson

dang toppers aser rank holders den digital connect asütsü atema tebilemba ka lemsatep.

Iba sentong nung School Education Advisor, Toghukha Sukhalu, Principal Director, School Education Shri Shanavas C, IAS aser DCP-II Dimapur Aotula Imchen, IPS nungertemia o tatsütsü jembi.

Sentong nung Asano Sekhose-i tejak shiyutepba mapang agi, Pastor, Mhasiselie Theünuo-i sarasadem, Miss Thejasenuo Kire aser Miss Meneno Chucha nati ken aden aser Special Secretary, School Education Kevileno Angami-i anküp tepela o jembi.

COVID-19 Nagaland: Nisung 32 dak putet

Kohima, April 17 (TYO): Honibarnü Nagaland nung nisung 32 dak COVID-19 aliba putet aser parnok züngsema nisung ajak agi 12,536 kümogo.

"Tanü nisung 32 dak COVID-19 putet. Parnokji Dimapur nung 23, Mokokchung nung 4, Kohima nung 3 aser Phek nung 2 lir" ta Health & Family Welfare Minister, S Pangnyu Phom-i metetdaksü.

Nisung 12,536 rongnung 12,102 taneptsü nguogo aser tang parnok 167 anepaludar, ta paisa ashi.

"Nagaland nung COVID-19 nungi taneptsü angubaji 96.54% lir," ta State Nodal Officer for

Integrated Disease Surveillance Programme, Dr Nyanthung Kikon-ia metetdaksü.

Nagaland nung COVID-19 puteter nisung 94 süogo saka parnok 10 bo tanga timtem ajanga asü. Külen, nisung 173 tashi tanga state temi ogo" ta paisa ashi.

Tang anepalurtem rongnung nisung 20 dak shirangba yimya terara lir aser 147 dakbo tajitetsü kecha mali, Dr Kikon-isa ashi.

Nagaland nung COVID-19 alitsü akok ta temolung melemba sample 1,40,194 tendangogo. RT-PCR ajanga sample 76,233, TrueNat ajanga 37,704 aser Rapid Antigen Test

ajanga 26,267 tendang.

Hokolbar tashi nung Nagaland nung nisung 1,13,473 nem covishield indang dose 1,45,858 agütsüogo ta State Immunization Officer Dr Ritu Thurr-i ashi.

Vaccine agirtem rongnung frontline workers 42,478, healthcare workers 13,331, teintet rogo 30,398 aser arishi küm 45 ser temapur 27,286 lir, ta paisa ashi.

"Parnok rongnung frontline workers 20,857, healthcare workers 9,091, teintet rogo 1,656 aser arishi küm 45 ser temapur 781 tashi dose anaprong agiogo" ta Dr Thurr-isa metetdaksü.

RIIN ajanga India senso shinga nem timtem magütsütsüla: CM Rio

Kohima, April 17 (Agencies): Register of Indigenous Inhabitants of Nagaland (RIIN) ajanga sorkari India kübok senso shinga nema timtem magütsütsü ta Nagaland chief minister Neiphiu Rio-i ashi.

"RIIN indang inyakyim mesüra mapa küma inyakdang India kübok state ajak nungi senso shinga timtem magütsütsüla" ta pai ashi.

Yashi Kohima nung kin hohotem aser civil society teloktem den RIIN atema senden amendang CM Rio-i iba ya ashi.

"Nagaland nungbo Naga

nunger rongnung lisopurtem maittsü jangjatsüba village council tem ajanga khuret kecha melii inyaktetsü saka tanga state tem nung lisopur Naga nunger jangjatsüba khuret ka lir" ta paisa metetdaksü.

Sikkim, Tripura aser Assam nung lisopurtem pei pei state nung nübo agi tangar memenep kümogo, ta Rio-isa tatishitsü bener arua jembi.

Dimapur ya nisung temeyoktep aliba district ka lir anungji tetsükdaksü aser khuretem ajak

jungjunga shisadangba sülen ILP inyakyim tenzütsüla, ta Nagaland Chief Minister-isa ashi.

Nagaland state ya 16-point Agreement ajanga kümtetba lir. Anungji Nagaland nung sensotem kümzüka ayutsü atema ozüng aser temzüngtem yanglutsü temeten agüja lir, ta paisa ashi.

Kin shiai sobaliba ozüngtem aser inyakyim benshitsü atema village, regional aser tribal council tem alitsü. Indian Constitution nung Act ka ajanga iba atema tashi agütsür, ta Rio-isa ashi.

Jacob Zhimomi Aoyimti nung Rostrum ka semzüksü



Dimapur, Rongchii/April 17 (TYO): PHED Minister N. Jacob Zhimomi-i Honibarnü Aoyimti nung Rostrum ka semzüksüogo. Aoyimti nung aliba lanurtemi süngkong tema, alakteta jaoker akhümкета agizüka liasü.

Iba Rostrum ya kija, lokti tentet balala aser yimdaklir temulungertemi tenla agüja yangluogo, koba Council aser VDB na longjemer achaayanga liasü.

Sentong nung o jembiba mapang N. Jacob Zhimomi-i,

lokti ajangzüksü atema teyari agütsüba sobaliba maneni beshiba atema yimdaklirtem nem tenüsang agütsü. Paisa, yimdaklirtem dang longjemer alitsü aser yimtsüng terenlok asoshi inyaksü ajungshi.

Maneni sentong nung shilem agitsü atema pa jaokba atema pelaba lemsatepba den tarutsü nunga teka amteter inyakyonga aotsü atema mulunga aliba lemsatep.

Kasa mapang nung village council Chairman Shri

Imnukloba-i, küm tepeyong Platinum Jubilee benjung nungdem nung sentong balala ayongzuka agiba nung iba sentong yaa ka, aser iba sentong nung alakteta jaoker aser mejeta jaokertemi shilem tajung agiba atema kanga pelaba lemsatep. Paisa, yimtsüng terenlok atema DRDA Dimapur fraternity-i kanga jangrabangra inyakba ngua kanga pelaba lemsatep. Iba sentong ya tepela anküp o tatsüka jembir tembang.

AR-i Kezocha nung merükmeju sentong ayonga agi

Dimapur, Rongchii/April 17 (TYO): Nagaland merük merüka toktsütsü atema inyaka aruba nung shilem ka ama HQ IGAR (North) kübok Assam Rifles Kohima Battalion-i April 16 nü Government High School, Kezocha, Kohima nung merükmeju sentong ka ayongzuka agiogo. Iba sentong nung tesayur aser kaketshirtemi shilem agia liasü.

Assam Rifles sepaitem den kaketshir 20 aser staff 10 longjemer school temeket merüktet aser iba mapa ajanga tangar nem merükmeju alitsü atema osang ka agütsüogo. Iba sentong ayongzuka agiba ajanga kaketshirtem nem lokti nung tajangzuka akaba maparen ka benoka inyakba indang tangazükba agütsüogo. Iba sülen kaketshirtem nem

mopung menenba aser tarutsü atema environment tajungba ka asoshi iba ya koda azüoktsü, iba indang tangazükba agütsü.

Kasa mapang nung Assam Rifles Kohima Battalion-i ayongzuka Sakhabama yimtsüng nung aliba lanurtem den Volleyball asaya ka asayaogo. Iba asaya lanur team-i 3-2 agi koka liasü.

District Health Society, Zunheboto senden amen



Dimapur, Rongchii/April 17 (Agencies): April 16 nü CMO office, Zunheboto nung District Health Society, Zunheboto senden den Transition to Fever-Rash Measles Rubella Surveillance Workshop agiogo.

Sentong nung o tatsüka jembiba mapang CMO Zunheboto, Dr. Akaho Sema-i züngsemtem dang district nung maparen balala anep anepa benoka inyaksü atema tali bendanga agüja inyaksü aser district inyakyim tajungba küma ajungkettsü ajungshia liasü. Paisa, sentong mashika kanga junga benoka inyaksüji kanga tongtibang ta ashiba den health workers tem dang nungdabapurtem tekolok shisatsü agi agizüka tzüradema yaritsü ajungmeso.

Maneni pai senden nung dena alirtem dang SOE tem mapang shidak nung benoktsü mepeshia metetdaksü. COVID 19 wara tanaben poktetshiba temulungdang yur pai health worker tem dang pei tata tesemtem nungi mainshi alitsü metetdaksü.

Kasa mapang nung SMO, Pughoboto CHC, Dr. J. Hokugha-i COVID 19 SOP aser tashidak tendangba tasa tasenba indang metetdaksü.

Senden nungsa DTO, NTEP, Dr. Aron Murru-i, National TB Elimination Programme indang sentepa alirtem dang rasaa ashi.

DPO (RCH & UIP) Dr. Nukshisangla Jamir-i, district nung COVID-19 vaccine agütsüba jenjang indang

metetdaksü.

Maneni SMO WHO Dr. Shiela-i, power point presentation ka ajanga Measles Rubella samatsütsü, wara poktetba mapang telangzüba tashi ita agütsütsü, tesendaktep akangshitsü- district nung hopta shia lepareprangshiba senden amentsü aser Measles Rubella samatsütsü atema nükjidong yur aliba ataloktsü asoshi tasatem indang lemsatep.

Lepa reprangshiba senden den Workshop nung CMO, DTO, DPO (RCH&UIP), SMO tem, MO tem, Vertical Programme balala Programme Officer tem aser BAC tem dena liasü. Iba senden ya Rosemary Vitoli, DPM-i tepela anküp o jembir tembang.

Nagaland Optometric Association-i metetdaksü

Dimapur, Rongchii/April 17 (TYO): Nagaland Optometric Association tir Nengneilhing Nakhro-i sangdong ka ajanga, Nagaland Optometric Association (NOA) ya state nung Optometrists lokti indang state representative lir ta ashi.

Iba association ya 2018 küm tentet aser 2021 küm March 25 nü Government of Nagaland nung züngoksemogo (registration no. HOME/SRC-7484), ta kasa sangdong ajanga metetdaksü.

Association-isa, Nagaland nungi Optometry graduates ajak dang State aser Central Council (Optometry Council of

India) nung züngoksemtsü metetdaksüogo. Tanga state nungi aruba Optometrist shirnok Nagaland nung inyakdar, parnok danga Allied and Healthcare Professionals Bill 2021 tetuyuba dak ajemdaker State Association nung züngoksemtsü metetdaksüogo.

Osang tejangjaba agitsü aser State Association nung züngoksemtsü atema phone (No 8119974313) ajanga ketdangsertem den tongteprateptetsü mesera nagalandoptometricassociation@gmail.com ajanga osang agitettsü, ta tir-isa metetdaksü.

Security Forces-i NSCN (IM) züngsem ka apu



Dimapur, Rongchii/April 17 (TYO): Police den longjemer Security Forces temi Dimapur District kübok Doyapur tesem nung April 14 nü NSCN (IM) züngsem ka puogo.

Osang tejangja angazükba sülen Security Forces aser State Police na longjemer iba tesem meita aoba mapang NSCN (IM) züngsem ka apu.

Sepaitemi iba nisungba ket nungi rakzürakdemtsü atema amshiba slip ka, Village Council indang identity Card taila ka aser mobile phone ka ngutetogo.

Aija alisang ya Sub Urban Police Station, Dimapur nem ken o maneni bushitsüngdangtsü atema bendanga agütsüogo.

Mon nung 'fire prevention & protection' workshop agi



Dimapur, Rongchii/April 17 (TYO): Department of Fire & Emergency Services, Mon-i 'fire prevention & protection' dak sendakba nung workshop ka ayongzuka katsüogo. Iba sentong ya April 17 nü Mon DC office Conference Room nung agia liasü. "Maintenance of Fire Safety Equipment is key to Mitigate Fire Hazards" omen nung ajemdaker April 14 nungi 20 nü tashi hopta ka Fire Service Week amungba nung shilem ka ama iba sentong ayongzuka agi.

OC Fire Station Mon, L. Yohan Konyak-i, iba hopta ya mi nungi jenboa alitsüba inyakyimtem sayutsüba atema dang masü saka mi lendong nung asürtem nem akümettushi agütsütsü atema ayongzuka

amunger, ta ashi.

Kasa mapang nung SI Tsarose S. Sangtam-i, mi lendong balala aser temseptsüba tasa balala indang jembü. Paisa, nüburttem dang jongdak mapang teyari agütsütsü mepeshia liasü. Sentong nung 2nd OC Fire Station Mon, Soyhunla Kent-ia, fire service indang nükjidong rasaa ashi.

Iba sentong ya ASI Dennis Singson lenisüba kübok agi aser ASI Razoukuolie Kiewhuo-i tepela o jembia liasü. Sentong tembangba sülen mi lendong dak sendakba inyakyim balala inyaka sayu.

Iba sentong nung Administrative Officers, HoD tem, DC Office Staff tem aser G.B tem dena liasü.

Assam nung Covid-19 aika putetdak primary tashi school shibangtsü



Guwahati, April 17 (Agencies): Assam nung nisung 100 tema dak Covid-19 puteta aliba district tem nung primary tashi school ajak shibangtsü.

Assam sorkari district tem nung face masks meinoker dang Rs 1000 senchi achitsü tetuyuba agütsüogo.

Assam Education & Health Minister Himanta Biswa Sarma-i Gauhati Medical College and Hospital (GMCH) nung osangbener den jembidang iba osang metetdaksü.

"Covid-19 kanga putetba

ajanga aser talisa iba ajanga tanur nem lendong bentsür aruba agi nisung 100 tema dak COVID-19 puteta aliba district ajak nung primary tashi school tem shibangtsü," ta Himanta Biswa Sarma-i ashi.

"Nisung 100 den teküpok puteta aliba district tem nungbo Covid-19 SOPs bentshia school tem lapoktsü" ta paisa ashi.

Assam nung taküm January 1 nungi school aser college tem lapokba sülen kaketshir aika dak COVID-19 aliba putetogo.

Tesüiba ita ana tsüngda Kamrup (Metro) district nung kaketshir 20 shi ka dak

COVID-19 putetogo aser iba ajanga school temi online class dang agir.

Department-i school aser college tem nung COVID-19 vaccination camps lapoktsü tebilemba lir, ta Minister Himanta-isa ashi.

"Onoki arishi küm 45 ser temapur kaketshir nem mezüng vaccine agütsütsü. Newspapers aser media houses-ia teyari aginüra onok dang asüngdangteptsü akok aser onoki nurse yoktsü, saka arishi küm 45 ser temapur nem dang vaccine agütsütsü" ta paisa metetdaksü.

Meghalaya nung Covid-19 agi nisung ka asü

Shillong, April 17 (Agencies): Meghalaya nung Covid-19 agi shiranga nisung ka süogo aser nisung 121 dak COVID-19 aliba putet.

East Khasi Hills district nungi nisung ka asü, ta Health department ketdangsürtemi metetdaksü.

Meghalaya nung COVID-19 agi shiranger nisung 152 süogo.

Tang tasen puterem rongnung East Khasi Hills district nung 80, West Jaintia Hills nung 26, Ri-Bhoi aser East Jaintia Hills nung pungugu, South West Khasi Hills aser East Garo Hills nung anana aser North Garo Hills district nung ka dak putet.

Tang Meghalaya nung nisung 565 anepaludar.

East Khasi Hills administration-i Deobarnü Shillong nung shops, business establishments, markets aser roadside stalls ajak shibangtsü tetuyuba agütsüogo.

Iba tenokdang nung pharmacies aser pharmaceutical stores madener, ta East Khasi Hills DC Isawanda Laloo-i sangdong ka nung ashi.

NFR-i Covid-19 tetuyuba sülen manidaker dang Rs 500 senchi achitsü

Guwahati, April 17 (Agencies): Railway station nung aser train nung senzüdang Covid-19 tetuyuba sülen manidakterem dang Rs 500 senchi achitsü ta Northeast Frontier Railway (NFR) ketdangsürtemi metetdaksüogo.

NFR-i Assam health department den yaritepa railway station ajak nung Covid-19 tendanger.

Railway ketdangsürtemi passenger tem dang khu kanga mabentsü aser face covers/masks enokba den train nung tepila ayutsü tetuyuba agütsüogo.

Passenger ajaki train nung mamendang Aarogya Setu application download süa amshitsü tetuyuba agütsüogo.

Tesüiba ghonda 24 tsüngda Assam nung nisung 573 dak COVID-19 aliba putetogo. Parnok rongnung Kamrup (Metro) district nungi nisung 245 dena lir.



Assam Rifles indang Lunglei Battalion-i Lawngtlai district kübok Electric Veng nung Indian made foreign liquor (IMFL) apuba noksa nung angur. Assam Rifles-i Mizoram police den yaritepa Electric Veng tesem mita aodang yi dang masü saka prangpong-injangtem ngutet. (Aizawl, April 17)

Manipur nung night curfew ozüng agütsür

Imphal, April 17 (Agencies): Manipur sorkari April 30, 2021 tashi state ajungalen night curfew alitsü ozüng agütsüogo.

Manipur nung Covid-19 kanga putetba ajanga Hokolbar aonung nungi 'night curfew' ozüng agütsü. Iba ya aonung 8:00 ako nungi anepdang 4:00 ako tashi alitsü.

Ajisüaka, iba curfew kübok essential goods & services abenba garitem, hospitals, pharmacies, fire services,

power supply aser Covid-19 duty inyaktertem madentsü, ta sorkari ashi.

Hokolbarnü Manipur nung nisung 31 dak Covid-19 aliba puteta liasü. Tang puteterem ya tanga state tem nungi arurtem timba lir.

Manipur nung tang tashi nung nisung 29,610 dak COVID-19 putetogo aser tang parnok 165 anepaludar. COVID-19 puteter nisung 376 tashi süogo.

NPP-i anibateloktepi Garo Hills Autonomous District Council kümtettsü asüngdang



Garo Hills Autonomous District Council (GHADC) nung MDC 15-i Meghalaya Governor Satya Pal Malik den külemi agiba noksa angur.

Shillong, April 17 (Agencies): Meghalaya chief minister Conrad Sangma-i anir Garo Hills Autonomous District Council (GHADC) nung züngsem 15-i Governor Satya Pal Malik dang executive committee (EC) tasen kümtettsü atema asüngdangogo.

Tanü parnoki Shillong nung aliba Raj Bhawan-i oa Governor den ajuruteper. Tang GHADC züngsem 29 shimteta lir aser ano züngsem ka Governor-i shimtsü.

MDCs 15-i Garo Hills

Democratic Coalition (GHDC) kümtetogo. Iba nung National People's Party züngsem 11, independent 3 aser Garo National Council züngsem 1 lir. Ajisüaka, BJP züngsem ana maden.

MDC ana Shillong tongogo aser onok ajuruteper telemteba agitsü, ta State BJP president Ernest Mawrie-i ashi.

GHADC nung chairman ji Rakesh A Sangma, chief executive member (CEM) ji Benedict Marak aser deputy CEM ji Nikman Marak asütsü.

NLFB den yariteper ka apu aser tapoktsü aika ngutet

Chirang, April 17 (Agencies): National Liberation Front of Bodoland (NLFB) nem agütsütsü aliba tapoktsü aika Assam police-i ngutetogo.

NLFB tanishir M Batha den mapang talangka nungi yaritepa arur civilian ka nem bomb yanglutsü tetuyuba agüja liasü ta police-i temolung meleme bilemer.

Indo-Bhutan arem nung nisung kari NLFB nem tapoktsü osettem agütsütsü ta miim osang angazükba sülen Assam police-i April 15 aser 16 ayaterm nung mita ao.

Iba mapang parnoki tapoktsütem den nisung ka apu.

"Chirang police-i Lal Singh apuba den TNT explosiveseret

7.5, handmade guns 2, pressure cookers 2, 140 mtr wires, iron balls 106 aser bearings 28 ngutetba atema tenüngsang agütsür" ta Dr L R Bishnoi, IPS-i metetdaksü.

Arishi küm 45 tain Lal Singh (Bonaguru) ya Selekhaguri nunger lir aser pa dak taittsü ajitetba atema apu. Basumatary-i M Batha den tesentaktep tajung lir aser pai NLFB atema mapa inyaker.

"Batha-i iba mapa nung indangindanga shilem agi aser Singh dang item osettem bener arutsü tuyu" ta police ketdangsür kati ashi.

Pai ashiba nung ajemdaker par ki meketa mita aodang tapoktsü seret 7.5 shi ngutetogo.



TIR YIMYIM YIMOBILEM (EDITORIAL)

DIMAPUR AMUNGNÜ, RONGCHII (APRIL) 18, 2021

Tamajung dang tajung, tajung dang tamajung

Asenok mulungjang nung satani takok ngua inyakba mapa kaji, kechi Tsüngremi junger ta ashir aji tamajung aser kechi Tsüngrem tsüngdang shitak aji meshitak ta satani asenok nem angatetdaksüba ya asütsü. Iba satan sentong ya Lipok nung Eden tsüki nungi tenzük. Adam aser Eve na dang Satani Tsüngremi ashiba angaba agi masü saka mangaba agi dang parnok nüchi akümtsü ta mesüzüktetba mapaji tamamangtsüka lir. Aji oda, Satani nisung dang Tsüngremi majunga ta ashibaji tajung, saka junger ta ashibajiang majung ta ashiba nung amanga inyakba agi, kecha tetsübu melii alima nung kibur ser lia aliba jenjang nungi kilir ama asentsü sena inyaker külenang chia chiyongtsü aser tanaben ali kuma aotsüba temerenshi angu. Iba otsü alima meimchirtem ajaki meteta lir saka tanüa kasa Satan nem asenok ashiokdaksür. Satan-i asenok dang ita sen kija agibo tebok masüngtsü, anungji tebok asüngtsü atema mapa meinyakaka adjustment kar agiang ta ashir. Aji kanga shitak aser junger ta asenoki agizüker, anungji asenoki tiyazüji ochi kümer, taila nisung tenüng nung mapa meinyakba tiyazü bill agizüka agir. Ibaji tangar kar dang rakzür masü aser tangar ki kakpoka auyar masü, anungji iba sen nung jagi ter shilem benra aser Tsüngrem mapa asoshi tenla tera agütsüra, kecha masü Tsüngrema pelatsü ta Satani ashir. Iba sentongji kanga tajung aser ola madoki tai agi shitak kuma inyaktsüba mapa, anungji asenoki kecha matidaki inyaker. Annaias aser Sapphira natia tena akaba li yoker Tsüngrem nem ajunga tenla agütsütsü lia, Satani tena dang Tsüngrem nem ali ayokba sen ajungaji magütsüyonga ajungtsü ta jembi, anungji tenati shitaka ta agizük aser shilem ka tena asoshi agiteta ayu. Tsüngremibo tena mulungjang nung ali ka ayokba sen ajaki tenyartem nem Tsüngrem mapa asoshi tenla agütsütsü jembi, iba jagiang tenatia kecha mekurui aliji ayok. Ajisüaka, kechi Tsüngremi junger ta ashi, aji shitak masü ta Satani tena nem angatetdaksü, anungji tenati Tsüngremi ashibaji masü Satani ashibajiang shitak ta bilema inyak. Satani asenok yamaji külakoktsür aser tasübaleni asenok anir. Tsüngremi tamasayongi nisungtem dang kibalembu nung asüngteta alitsü asoshi ozüng agütsü saka Satani nisungtem dang tetsür tebur temeimteper o temeimteper na alitsüba ji tim dang ta tai agi shitak kümer ashi, anungji tetsür tebur kin kidong mashishitepi telinür o telinür na mashimashi mezüpelanga alitsü tenzük. Aji oda, Tsüngremi majunga ta ashiba ka Satani junger ta shir inyakdaksüba nungi tanü asenok kibong aser lokti nung mazükmaru timtem takoksa aika ajurudagi. Ainker Isaia mapang nunga Israel nungertem Tsüngremi junger ta ashiba mapatem masü saka Satani junger ta ashiba mapatemang inyak. Anungji, ainker Isaia-i Israel nungertem dang, nenoki Tsüngremi ashi mangai amentepa yangluba kidanga nenok malitsü aser nenok alu tulu aliloka alu ayimba nungji takoksa tulu ajurutsü ta ashiba Isaia 5:8-10 nung shia angur. Tsüngremibo majunga ta ashi ser nung asenok takar kümnüdang aser asenok takok ngunüdang, Satani lumia sarasademra ajungtsü ta ashiba nung amanga, asenoki lumia sarasadema tashiyim aser ochimashi inyakba mapatem indang ya Tsüngremi koma bilema alitsü ? Isaia 5:20 nung ashir, " Shirnoki tamajung dang tajung aser tajung dang tamajung ta ajar, shirnoki tammang dang tesangwa aser tesangwa dang tammang ama züngshir; shirnoki taku dang tanang aser tanang dang taku ama züngshir, parnok asoshi aiatai. Ibai Isaia ainkeri ashir masü, Tsüngremi ashir. Tenüngsang ken 37 nunga ashir, " tamajung inyakerji kopi melii ayi ama lepdoktsü aser tsünütsü lanu ama akongtsü. Kenpiga lirbo tamajunger malitsü, nai pa taküm alidang aliba tesema mereprangteti kümadoktsü." Tsüngremi majunga ta ashiba asenoki asensasa junger ta bilema inyakba ajanga anguba temoatsü aser takokji asenoki ngua kenyongi meshimeshia mali kuma samatsü ta iba Lai o yagi ashir. Atangji, asenok shingaia meshimeshia melitetsü saka Tsüngremi ashiba angatsüabajiang asenok mapa asütsüla.

OLEMSABANG

Putu den apet tenzük

~ O. Meren Longkumer (Otongdar)

"Putu ka aor aser tanga putu ka arur, saka alimaji teti alir (sayur. 1:4)".

Okila: Tulus-tilar, tazünger-mazünger ajaki tanü putu kera-aniba lokti ajak nung jembar aser angashir. Laishiba pututem süia araba tongmelang agi kodang shisadangdir Tejen Lai pututem süia aruogo, tasen lai nung Yisu Khrista putu, Yisu nütsüngtem putu aser Tanüla temeshi putu ta jaa liasü; aser tang putu dang ya " Shitetsü makokba" (unpredictable age) putu ta-a ajar. Ano kodang alima tsütsülen reprangdir, science aser technology renloka aoba ajanga, space age, computer age aser tang putu dang "Super fast age" ta ajaba asenoki amgur. Tanübo alima ajunga ya yimtsüng ka (global Village) ama dang ta jembar, iba dang temaba alimaji tekabo teka dang (global palm), lokti ka dang (single community) ta jembar. Sobaliba, libaliro, sobusolemtsü yimya ajak kasa dang akümba mapang ka ta sociologist aser economist temi jembar. Science aser technology ajanga alimaji joko tilaba akümbaji asenoki tenük agi jangjaa angur. Information aser communication technology -internet, mobile phone, website, print & electronic media, etc. renloka aoba ajanga alima putu melenshiba ajanga, tanü putu den apet tenzük ka teinyaktsüji aika lir ta angateter. Itemji yangi tongmelang agi kar lemsateper.

1. Tejen inyakyim (method) melentsü nüngdaker:-

Tanü putu den apet tenzükertem inyakyim melenshitsüji rongdak nüngdak ta bilemer. Asen Naga lima dang 'Khristan State' ta ajar saka shitakba nung kodang reprangerdir, shilem pezü nung asembo tenüng agi dang Khristan (Nominal Christian) kümadokogo. Arogo nung tenzük mapa ya pei arogo sasep nung dang achaayanga küm tepiyong inyaka aotsü tongtipang sentongtem- Revival, bible study, Youth camp, Retreat etc. item kisüng yagi tangbo tanü asen aliba putu nungbo meperir amai bilemer. Tanü lima Mass Media ajanga anüolen alir Sobaliba, achiajem, sobusolem, libaliro aser talisa tamangbaren tsütsü par sayutsüngiba yimya aser arogo nung inyaksangshi mapatem ajak ajizüka, itemji jilusa amshitepba angur. Item inyakyim ajanga amangbapurtem tanüla nung jangradakja, Tsüngrem anasa aoba kuli jenti lir. Saka asen Ao Arogotem nungbo küm tepiyong inyaka aotsü calendar yanglur iba nemji dang anidaksür. Arogotem asoshi Tsüngrem sentongji kechi aliar asenoki memetet: Ashiko Pa sentongji Tsüngremi jelia metetdaksütsü asü mesüra jungdak nung dang metetdaksütsü asenoki ashitsü makok anungji, Tsüngremi mulungba dang süra, Pa sentong atalokdaksütsü asoshi akhi tejen yimya melenshia sentong tasentem tanü putu den apet (inyakyim tasen süaka), Arogo nung inoksema amshitsü alimai akhanger.

2. Holistic Ministry:-

Holistic ministry ta asüba olung ajanga taküm rangben asoshi jembar. Tanüla aser alima libaliro, sobaliba, shisatsü, inyaksangshi, jembishinü item ajak nung Khristan ka ama alitsü nübur dang sayutsüba ji holistic ministry nükjidongji lir. Temang anema alitsü asoshi tzü-mopung, süngdonglidong, shiruru kümsüka ayuba, rongsenketsüng tsütsü teinyaktsü aser tanü lokti tebilemtsü nung khristan kati koda shilem agitsü item ajak ya holistic ministry nung sendaka lir. Aji oda, karaa ainba putu nung, amangbapurtem tanüla kisüng kümsüka alitsü asoshi dang masü saka taküm rangben nung khrista kamdaksütsüba ji tenzük wadang nükjidongji asütsüla. Yisu Khrista alima nung tenyaba mapa inyakdang, tanüla kisüng kadaksütsü asoshi dang masü saka taküm rangben tekümtet agütsütsü asoshi inyak. Khrista temang shih nung tashitak aketer aneptsüba den tanüla nunga temoatsü shih nung tashitak aketer aneptsüba den tanüla nunga temoatsü ngudaksü; anungji Yisu-i sayuba yimya nungji ajemdaker tanü tenzükertemia inyaktsüla.

Kodang Tsüngrem tenzükba wadang ya nübur aser loktiliba den peta, lenmang ajak nungi inyakdir, idangjiang Tsüngrem O-ji putu den tapet küm, aji ajanga lokti aser Arogo nung temelenshi adokdaksütetsü.

3. Putu den apet tenzükba wadang renloka aotsüla:-

Dr. Lanusosang-i züluba ocet ka nung yamai ashi, "azüngba den meputep mapa nung tamakok adokdaksür, aser ano tazüngtsü tashi zünger mapa manguba ajanga tebilemtsü adokdaksür, tanü iba tensa nung zünger degree tajung ngur mapa 'Career' meyanglutetba jentipur lir. Educational system ya tai asü? Mesüra tazüngertemi degree nguogo ta süaka aika 'unemployable' tem lir. Tebilemtsü tulu iba ama tai ngur joko educational system ya tensa aser nüngdak yari melenshia aotsüla ta jembitepa merangbaji international level tashi nung adokdagi, züngzük mapa tim-medemi yitetsü mechi nung joko takok tashi 'Course structure' melena arudagi".

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Gospel for Asia-i tang mezüing Africa nung mission tenzüker



Texas nung amenoka aliba humanitarian agency Gospel for Asia (GFA World)-i India nung tanurtem nem chiyungtsü agütsüba noksa nung angur.

April 17, 2021: Alima nung mission agencies tulutibatem rongnung ka- Gospel for Asia-i tang mezüing alima nung sensaktiba continent- Africa nung mission tenzüker.

Gospel for Asia dang tangbo GFA World, ta ajar aser taküm parnoki Africa nung aliba linük aika nung mission mapa tenzüksü.

Africa nung aliba linük Rwanda nung mission tenzüksü atema sangdongba mapang nung GFA World tentetsang, K.P. Yohannan-i, "Africa ya nüktzü kodanga makongba lima ka lir. Teimla samar alirtem atema onoki chichiba teimla agütsütsü aser Tsüngrem temeim metetdaksütsü nükjidong nung inyaker," ta metetdaksü.

1990s mapang nung East-central Africa nung aliba Rwanda linük nung rara mapang nisung 800,000 dak tema asüba aser linük jenjang telungi aiba sülen tang iba linük tanaben asentenshia yangerdar, aser GFA-i iba linük nung mezüing mission tenzüksü.

'Revolution in World Missions' kaket zülusang, Yohannan-isa, "Rwanda nung takütem kümzüksü aser sensakertem tenzüksü atema onok nem kishi lapoktsüogo," ta metetdaksü.

GFA World indang mission nung Rwanda sorkar, Arogo lenirtem aser Arogo züingsemtemi yariteptsü. Linük yimtiba, Kigali nung aliba slum

area nung parnoki senksakertem tama yaria iba mission tenzüksü tebilemba lir.

GFA World-isa Africa tesem ajaklen healthcare projects tenzüksü, aser iba mapatong kübok Sisters of Compassion workers nungi missionary aika yoka amitsürtem, lajartem aser zütsüra keta alirtem aliba tesem nung alirtem tenzüksü.

"Onoki continent tesem ajak ayimjemtsü aser Africa nung tanur meyrjangsa meyrjang yaritsü nükjidong lir," ta Yohannan-i ashi.

Tang GFA World-i Asia tesem ajaklen child sponsorship programs kübok tanur meyijang aika nem shisaliok tajung agütsüdar.

"Africa nung nütsüing shilem tesadang shibo arrshi küm 15 ser tekübokpurtem lir aser Average life expectancy ji küm 50 llir. Item kuli nung ajemdaker onoki yangji aliba nisung million aika dang Khrista osangtajung prokner, aser ibaji inyaksü atema tang mapang peria lir. Parnoki teyari atadar, parnok aika süadokdar," ta Yohannan-i metetdaksü.

GFA World-i Africa nung iba mission kübok "Jesus Wells" omen nung ajemdaker yimsüingtem nung tzü temerük agütsütsü, kechiyong terenlok maliba tesem aika nung tanurtem aser kibongtem tzü tamajung jemdar.

1979 küm Yohannan-i tenzükba GFA World ya alima nung tamangba yimsü nung

ajemdaker tentetba humanitarian organizations tulutibatem rongnung ka kümogo. Parnoki Arogotem nem tashi agüja kanga sensak tia nung aliba nisung million aika yaridar.

Africa nung GFA World-i Rwanda nung aliba lisopurtem nem training agütsütsü iba sülen parnoki Africa nung tanüingba linüktem nung nüburtem yaritsü.

GFA World-i Asai nung Nepal, Sri Lanka, Bangladesh aser India densema linük aika nung Arogo 12,000 aser item Arogo kübok nisung million aika taküm nung temelenshi bener arutsüogo.

Africa nung talisa South Sudan, Central African Republic aser Sudan nungbo nisung 10 shia nungi nisung 9 bo slum area nung alir.

Yohannan-i, "Onoki nisung ajak indang kilirtem kümner aser onok taküm libaliro ajanga parnok dang Khrista kuli süner," ta ashi.

"Yisu-i par nütsüingtem dang alima nung temelenshi bener arujang ta ashi. Onoki Africa nunga iba mission inyaksü aser iba ya tenyaba mapang ka lir. Alima nung meimchir ajak nem onoki teimla aser taneptsü agütsüner," ta pai ashi.

"Tang alima nung timtem balala atema telangzübaji Yisu Khrista dang lir. Onoki lenmang balala ajanga osangtajung proktsü aser Arogo amenoktsü. Mapang aser tatem maka taküm atema lenmangji ibaji dang lir," ta paisa shisem.

Eritrea linük nung sarasadem agidang Khristan 35 tashi apu

April 17, 2021: Taoba ita Eritrea yimtiba, Asmara nung Khristantem sarasadem sentong ka agiba mapang nung sepaitemi parnok mita aodang tetsürtem timba ser nisung 23 apu, ta Release International osang ajanga metetdaksü.

Kasa mapang nungjisa Asmara nungi mile 660 pilar aliba Assab yimti nunga ki ka nung Khristantem sarasadem sentong agiba mapang nung nisung 12 puer ao.

Khristan 35 pronglaji anasa aliba tepuokdak kati anir oa puoka liasü.

April 15, 2021 nü Barnabas Fund-i sangdong ka ajanga, Asmara nung apuba Khristan

23 nungi 22 bo Amongnü chiokogo; kabo kechiba mechiokar mejangja, ta metetdaksü.

"Tang Eritrea linük nung sorkari Khristantem anema inyakba ajema akümba mapang ka nung tawa Khristantem nem timtem agütsür," ta Barnabas Fund-i metetdaksü.

Yaküm August ita nungi tenzüka tang tashi nung Eritrea linük nung Khristan 171 bo tepuokdak nungi chiokogo, aser ibaji ajanga linük nung Khristantem anema inyakba ajema akümba kuli sayur, ta Barnabas Fund-isa metetdaksü.

Alima nung Khristantem

mejungi reshikangshiba linüktem rongnung Eritrea densema lir.

Tang Eritrea nung Khristan 500 shi tepuokdak balala nung lir. Khristan aika apuba sülen parnok kong aliar mejangja; süadoker asü tepuokdak aliar mejangja.

"Eritrea nung aliba jail tem kanga majung, karbo shipping containers nung ayur aser kar dangbo Khristan yimsü tokjang ta shia reshikangshir. Tang Khristantem chiokba atema asenoki pelar, ajisüaka maneni tepuokdak alirtem atema sarasademdaksüner," ta Barnabas Fund-isa mepishia metetdaksü.

ANOGO ABEN TSÜNGREM DEN
MULUNGSENTSÜ AJUNGA AGI

"Aser Kibuba ne Tsüngremi ne mulungjang ajunga agi, aser ne taküm ajunga agi, aser ne mulungsentsü ajunga agi, aser ne tashi ajunga agi nai pa meimang". Mk.12:30

Khünü Kibuba Yisu dangi Yihuda nunger ozüing meteter rongnung tezülur ka arua ozüing rongnung tulutibaji koba asütsü ta asüngdangba indang angur.

Par Yihuda nunger tejen yimsü ozüing noklang troksür ter asem (613) agi khangbanger kija, kibong aser tamanger lokti ajunga nung item ozüingtemji Tsüngrem kümdaksür lia aruba mapang ka nung Yisu-i item tesayuba anema aiben jembiba indang Laishiba nung lepa angur. Yisu Khrista mapang nungji yimsü nung tanishirtemi anir tamangertemji (Yihuda nunger)- tema tereprangtsütsüjibo kanga tobur tajung saka temulungjang telung nungbo tesembatsü mapatem agi sünger alibatemji ngua itemji temeim mapa benshiba nem melenshidaktsünübaji Pa taginüba liasü.

Tanü asen tamangertem jenjang ya reprangra Yihuda nunger Farisi, Saduki aser tezülur anemsübatem mesük, asenok tema tereprangtsübo kanga tajung, saka temulungjangbo Tsüngrem nungi talangka pilaa oadokba takümtem, arung mulungsentsü aika adenba tamanger ka masü, saka Yisu-i ashiba O nung azüiter amangdi. "Aser Kibuba ne Tsüngremji ne mulungjang ajunga agi, aser ne taküm ajunga agi, aser ne mulungsentsü ajunga agi, ne tashi ajunga agi nai Pa meimang".

SARASADEM

Kibuba ni kü mulungjang, kü taküm, kü mulungsentsü aser tashi ajunga agi Na meima Ne dak amangtsü tangatetba nung jajatsü yariangma. Amen

Indian American Muslim Council-i India CPC nung züngoktsü mepishi

Hyderabad, April 17 (Agencies): Indian American Muslim Council-i United States Commission on International Religious Freedom (USCIRF) dang India linüki nütsüing ajema aliba tamangba yimsütem (Khristan, Muslim, Sikh etc) maneni reshikangshir, anungji India -a "Country of Particular Concern" (CPC) linüktem rongnung züngoktsü atema US State Department matsüngdang benokang, ta mepishia metetdaksü.

April 12 nü Indian American Muslim Council-i shidi ka ajanga USCIRF Chair, Gayle Manchin aser Commission züingsem 8 dang, "India nung federal sorkar aser state sorkartemi religious freedom anema inyaker. Yaküm USCIRF-i mezüing India CPC nung züngoktsü atema benokba sülen tesüiba küm ka tsüingda ano tamajungba kümogo," ta metetdaksü.

"Atangji India ya CPC nung züngoktsü kanga tetemsü aser alima linüktemi meinyakra ano tamajungba akümtsü," ta shidi nung shia lir.

USCIRF-i April 21 nü 2021 Annual Report sangdongtsü lia onoki parnok dang India CPC linüktem nung züngoktsü atema

mepishiogo, ta Bodhbarnü Indian American Muslim Council (IAMC)-i sangdong ka ajanga metetdaksü.

IAMC-i ashiba agi, iba shidi nung sign süa aliba lokti tentettem rongnung- Hindus for Human Rights, International Christian Concern, Indian American Muslim Council, Church of Scientology National Affairs Office, Federation of Indian American Christian Organizations of North America, Dalit Solidarity Forum, American Muslim Institution, American Sikh Council, Center for Pluralism, Global Christian Ministers Federation, India Civil Watch International, International Organization to Preserve Human Rights, International Society for Peace and Justice, Justice For All, Just Law International Parity, Plateau State Youth Council aser Progressive India Collective Voices for Freedom densema lir.

"USCIRF-i maneni India indang ochi jembitsü onoki imlar aser taküma India züngoktsü aser ibaji ajanga US sorkari India CPC nung züngoktsü imlar," ta parnokisa metetdaksü.

OLONG PAITEP # 5785

1			2			3			4	
			5		6		7			
8										
			9							
	10									
15						16				

TIPIEN

1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T _ _ _ lu - (3)
10. Takdang temalen - (9)
11. Tesa _ _ _ a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüingsak-mopung - (5)

LANGTSÜNGLEN

1. Reprangdaksü - (4)
2. _ _ _ ur - (3)
4. Kiojen yangludak - (6)
6. _ _ _ _ _ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemtdak - (6)
12. _ _ _ _ adenshi - (4)
14. Tsünüsenbongtsü adokdak - (3)

OLONG PAITEP # 5784 TELANGZÜBA

TIPIEN :

1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.

LANGTSÜNGLEN :

1. Khu, 2. Süjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Täju, 21. Ano, 22. Onü, 23. Kua.

KOMA SÜLA TELANGZÜBA

Q. Tang Nagaland nung government medical doctor-temi akangba ama, parnok kisüng atema, parnok govt mapanungi anentsü asoshi tasoba küm 60 aliba nungi 65 kümtsü nunga koma süla ?

Tang Nagaland nung tenyadkak Doctor temi parnok tasoba küm 60-65 yeras nungi ajungketer maneni mapa inyaksü akanger. Parnok kisüng atema küm 65 tashi ajungketba ji majungtsü, kechiaser lanurtem Doctor zünger mapa inyakner noklang aika lir, parnokjia asen Naga nungersa, anungji parnok nema menden ji azüngteta yutsütsüla. In service Doctor tem non-practicing allowance 20% achir aser anosa pei pei clinic nung practice aser aji agia teperi anungji küm 60 nung pela pela retire sür pei pei clinic nung ajem ajema practice asü nung ajungtsü.

- Chubaba, Kohima

TANÜBO NAI LANGZÜANG

Q. Wayanad Wildlife Sanctuary ya State koba nung lir?

A. Tamil Nadu B. Kerala C. Karnataka D. Andhra Pradesh

===== (Taruba adok nung onoki langzütsü)

YASHI ADOK TELANGZÜBA : 2015

AO OSHI ANGAZÜKDAK:

TANÜ ANGAZÜKTSÜBA OJANG

Benket

(v) bener tua ayu (carry up)

* Onoki süng aser lung ajak tekalen **benket**.

Benlok

(v) tokolak nung khu aben (carry load on head)

* Merenbai onok khu ajak **benlok**.



Tir Yimym

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimym bureau tem nung agüjang.

1. Tenüng :
2. Tasoba anogo :
3. Küm :
4. Class :
5. School :
6. Talidak :
7. Salem osang :

Tepela Tasoba Anogo



NAI-A YA METETTER MA?

INDIA NUNG NÜNGTUGU SOFTWARE COMPANY KAR:

1. Hyperlink InfoSystem
2. Tata Consultancy Services
3. HCL Technologies
4. Infosys
5. Wipro
6. Mphasis
7. Tech Mahindra
8. Capgemini India Pvt Ltd
9. Accenture
10. HData Systems



SUDOKU # 5828

5	6		4	9	8			2	4	8	7	3	6	5	1	9	2
	4		1		2	6	5		9	2	5	4	7	1	8	3	6
		1					8	4	6	3	1	9	2	8	7	4	5
		4	6		9	2	1	5	7	6	4	1	3	2	5	8	9
	2		3					8	3	9	2	8	5	7	4	6	1
8	9			1		3	4	6	1	5	8	6	9	4	3	2	7
	8	3	7	5			2		5	4	9	7	8	6	2	1	3
		2	9			8		1	8	7	3	2	1	9	6	5	4
	1					5			2	1	6	5	4	3	9	7	8

TELANGZUBA # 5827

OJANG LUTEP # 5372

- EMBTJIRI :
- JUNTAG :
- NGDA :
- MBJEI :
- KASA :
- MAJUTANG :
- ERBILEMI :
- JUNTAG :
- HAKEC :
- TETTNGASMAÜ :

OJANG LUTEP TELANGZÜBA # 5371

TSÜRABURJI TASHIR MESÜRA MASHIR ASÜYONGJIA CHIRNURTEMI
PARNOK MEIMA AKUMTSÜBUTSÜ NÜNGDAKER

TAN HOPTA ATEMA - KOMA SÜLA ?

Q. Covid-19 wara nokdangtsü atema yaküm 2020 küm ama, ita junga lockdown asünunga koma süla ?

Olong 20 shi nung April 16, 2021 tashi nung iba telangzüba ya onok dangi (e-mail - tiryimyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzübatemji taruba Honibarnü adoktsütsü.



April 17, 2021: Patna nung Jharkhand High Court-i, fodder scam ken o dak sendakba nung Rashtriya Janata Dal aser taoba Bihar chief minister, Lalu Yadav nem bail agütsüba sülen par kima osangbenertem adenshiba noksa nung angur.

Gujarat nung Kumbh Mela nungi arur ajak tendangtsü

New Delhi, April 17 (Agencies): Haridwar Kumbh Mela nungi arurtem ajak dak RT-PCR test agitsü ta Honibarnü Gujarat Chief Minister Vijay Rupani-i metetdaksüogo. Gujarat nung COVID-19 kanga menateper aser iba jagi Kumbh Mela nungi arurtem RT-PCR test magi tashi pei pei alidaki meyoktsü ta Gujarat CM-i ashi. "Gujarat nung district ajak nungi collector tem dang Kumbh Mela nungi meyipa arurtem dak tenük yoktsü tetuyuba agütsüogo. Parnok RT-PCR test mesüi pei pei talidak meyoktsü atema nakabandi' (security checking) asütsü

shiogo" ta Rupani-isa metetdaksü. COVID-19 aliba putetertem anogo 14 tashi balaka mongdaksütsü. District ajak nungi Collector tem dang Kumbh nungi arurtem metettsü tetuyuba agütsüogo, ta paisa shisem. Taoba mapang Madhya Pradesh Chief Minister Shivraj Singh Chouhan-ia Cabinet senden ka nung Uttarakhand kübok Kumbh Mela nungi arurtem dak tenük yoktsü aser COVID-19 tendangtsü atema jembia liasü April 10 nungi 14 tashi Haridwar Kumbh Mela nung nisung 1,701 dak COVID-19 aliba putetogo.

Tamangba yimsü lennir aika dak COVID-19 aliba putetogo, ta Haridwar nung medical office ajanga metetdaksüogo. Gujrat nung mozü kidang yipden peria maliba atema Chief Minister Rupani-i taruba anogo 15 tsüngda yipden talila 10,000 benoktsü ta shiogo. Hokolbarnü Gujarat nung nisung timtiba dak COVID-19 puteta liasü. Yashi nisung 8,920 dak COVID-19 aliba putet aser parnok züngsema nisung ajak agi 3,84,688 kümogo. Hokolbar nungsa COVID-19 agi shiranger nisung 94 asü aser parnok züngsema tasür ajak agi 5,170 kümogo, ta state health department-i metetdaksü.

Kerala nung tanü nisung 13,835 dak Covid-19 putet

Thiruvananthapuram, April 17, 2021 (Agencies): Honibarnü Kerala nung nisung 13,835 dak Covid-19 tashidak putetogo. State nung iba wara pokteter Honibar anogo putetba ya timtiba alitsü. Hokolbarnü, Kerala nung Covid-19 tashidak puteter nisung 10,000 dak tem tuogo. State nung tan hopta tetenzüklen Test Positivity Rate (TPR) medemdangra (12.53%) tang Kerala nung TPR shilem 17.04% atur alitsü. Kerala nung anogo ana tashi Covid-19 Test drive sentong agia liasü, koba Honibarnü tembangogo aser tarutsü anogotem nunga Kerala nung Covid-19 tashidak puteter timba akümtsü asadangteter, ta ketdangsür sangdong ajanga metetdaksü. Hokolbarnü, mass Covid-19 Test shilem ama, State kübok

tesem balala nungi sample 1,35,159 bendenogo aser item nungi sample 81,211 tendangogo. Tanüngba sample tem atema aruya aliba anogo ishika tsüngda metetdaksütsü imlar. Tesüiba hopta ana tejakdang nungi Assembly election atema vote agütsüba mapang nungi Kerala nung Covid-19 tashidak tasen putetba register süa aruogo. Kerala nung nütsüng yongsük shilem 13.78% jungnüa nem Vaccine agütsüogo, ajisüaka, sangdong kar ajanga angazükba agi, tajangzük angutsüpur tem aika liaka, centre kar nungbo vaccine peria mali aser tatakzük dang agütsür. "Kinungtsü küna iba vaccine atema register asü aser nikongdang 1:00 nungi 3:00 tashi mapang latettsü. Ajisüaka,

iba tesem tonga arur sülen, küna dang mozü temogo ta ashi. Tang, künaprongla kidangi meyipa aoer. Dose peria melira, kechiba parnoki küna tenüng zülüok?," ta Hokolbarnü Binu Kumar-i NDTV dang ashi. Honibarnü, Kerala Health Minister KK Shailaja-i, State-i vaccine dose lakh 50 akhangba lephsia ashi. "Tongtibang telok nem vaccine agütsütsü atema, vaccine dose lakh 50 nüngdaker aser iba mozü atema onoki centre sorkar dang lephsia shiogo aser Centre-i agütsütsü imlar. Ajida mesüra onoki vaccination center tem shibangtsütsüsa akümtsü aser maparen takok mangutsü," ta KK Shailaja-i ashi. Tang State nung oxygen aser tanga nüngdakba osettsüset agi metokmeperiba mali, ta paisa metetdaksü.



April 17, 2021: Linük ajunga nung COVID-19 tashidak kanga kara menatepyonga aoba tialong nung Maharashtra nungi mapa inyakertem special train ka nung Ranchi kübok Hatia railway station tonga aruba noksa nung angur.

Taoba CEC Sunil Arora Goa nung Governor shimtsü akok

New Delhi, April 17 (Agencies): Taoba Chief Justice of India Ranjan Gogoi Rajya Sabha züngsem asütsü shimba sülen küm ka lir Centre sorkari taoba Chief Election Commissioner (CEC) Sunil Arora Goa nung Governor inyaksü shimtsü telemtetba agiogo. Arishi küm 65 tain Arora-i Hombarnü CEC menden nungi anen. Pa ya Rajasthan cadre nungi 1980 batch IAS officer ka lir. Taoba CJI Gogoi ya yaküm March ita Rajya Sabha nung MP asütsü shim. Pai CJI menden nungi anenba sülen ita pezü lir pa MP shima liasü.

Arora-i Information & Broadcasting Secretary inyaka lia September 1, 2017 nü Election Commission nung pa shim. Modi'er sorkari pa Goa governor inyaksü shimtsü akok kechiyong Arora-i menden balala nung mapa inyaka aruogo. Pai taoba Rajasthan CM Vasundhara Raje den Principal Secretary ama aser Indian Airlines nunga chairman & managing director inyakogo. Goa Governor Satyapal Malik mapa nungi anentsüba sülen Maharashtra Governor Bhagat Singh Koshyari-i tang Goa Governor repsema inyaker.

West Bengal nung election phase 5buba tesunep nung tembangogo



April 17, 2021: Salt Lake, Kolkata nung State Assembly Election phase pongububa nung nüburtem vote agütsütsü atema polling station ka kima tarensena nokdaker aliba noksa nung angur.

Kolkata, Rongchii/April 17 (Agencies): West Bengal Assembly Election 2021, phase pongububa tesunep nung tembangogo aser tetsür voter tem aikati shilem agiogo, ta Election Commission-i Honibarnü metetdaksü. Assembly constituency 45 kübok polling stations 15,789 rongnung kar nung mangatettep tilateri adokba dak alaker election tesunep nung tembangogo. RSP candidate ka asüba sülen 56-Samserganj aser 58-Jangipur assembly constituency nung election thinenogo. Arishi küm 73 tain RSP candidate Pradip Kumar Nandi dak covid tashidak potet aser pa Hokolbarnü Berhampore nung mozüki ka nung asü. Tanga tatalokba ka nung South 24 Parganas kübok Deganga constituency nung central forces-i injang akhaba osang angazükogo aser iba sülen commission-i osang tejangja meshiogo.

maneni BJP-i Mamata indang clip dak sendakba nung jenjang tapet agitsü EC dang mepeshia asüngdangogo. Iba takhangba ya taoba anogo 17 tsüngda takhangba 5buba asütsü. "Election tembangba sülen BJP-i menden 294 nungi 70-a mekoktettsü ta ni shiteter," ta West Bengal chief minister Mamata Banerjee-i ashi. TMC lenirisa Bidhannagar nung long agi aonba BJP dak tai tongloksüogo. Iba lendong nung mapa inyaker ana yirua liasü. Maneni Siliguri nung TMC aser CPI (M) pusemertem polling booth ka kima mangatettep adok. Nadia, Santipur nung central forces-i voter tem dang meyipa aotsü ashi, ta Trinamool-i shiogo. Election Commission-i ashiba agi, iba phase nung Ballot Units (Bus) 15,789, Control Units(CUs) 15,789 aser VVPAT 15,789 amshiogo.

Kasa mapang nung Bidhannagar kübok Shantinagar tesem nung Trinamool aser BJP pusemertem tsüngdang mangatettep adoka liasü. Party anaprongla pusemertemi voter tem vote agütsüi midaktsür ta shia kati ka aitsütepba sülen mangatettep adok. Iba lendong nung nisung ti yiru, ta PTI sangdong ka ajanga metetdaksü. Mangatettep adokba sülen Trinamool Congress MP Sujit Bose aser BJP candidate Sabyasachi Dutta nati iba tesem semdanga liasü.

Election phase pongububa agiba mapang party tem tsüngda kati ka maneni aitsütepogo aser West Bengal Chief Minister Mamata Banerjee-i ashiba agi, la indang phone tap süa liasü. Cooch Behar nung asürtem indang lokti tentettem den rally ka akatsü atema benokdangba indang audio tape ka temai adokba sülen la indang phone tap sütsü ta lai ashi. Election phase 6, 7 aser 8buba April 22, 26 aser 29 nü agitsü, kechiyong Election Commission-i wara pokteter liaka phase tem lokteper magitsü ta metetdaksüogo.

Bangladesh nung police-i nisung 5 tepset



Bangladesh police-i injang agi akhaba sülen yirur alirtem mozüki bushia aoba noksa nung angur.

Dhaka, Rongchiii/April 17 (Agencies): China-i senotsü teyari agüja yanglua aliba power plant ka nung Honibarnü longkak aitertem dak Bangladesh police-i injang agi akhaba sülen nisung pongu süogo aser aika yiruogo. Mapa inyaktertem azüoktsü mekoki akümba sülen police temi parnok dak akha, ta Banshkhali nung government administrator, Saiduzzman Chowdhury-i ashi.

Parnok ya taa magütsüba, mapang talila mapa inyaktaktsüba aser mezüngmshia amshiba atema longkak aita liasü. Banshkhali police chief Azizul Islam-i, longkak aiter 2,000 shi-i police tem dak long agi ano aser police temi meyiper parnok dak injang agi akha, ta ashi.

2.5 billion-dollar intoka yangluba 1,200-megawatt coal power plant, kong China nunger company SEPCOIII meyong shilem 30 lir, iba plant nung kümtem tsüngda mapangshia mangatettep adoka arudar. 2016 küm yimdaklirtemi longkak aitba mapang police temi injang agi akha aser nisung pezü tepset. 2017 küma police temi rally ka agiba mapang injang khalokja nisung ka tepset.

Honibarnü lendong nung asür nisung pezü injang agi akhaba tarak keter Banshkhali nung mozüki tongtibai anir aruogo, ta doctor kati ashiba den nisung 12 yirur temang anepalutsüogo, ta ashi.

Kasa mapang nung Police-ia iba osang jangjashija asür rongnung pongububa aser police asem densema lendong nung yirur nisung 19 Chittagong nung Rights activists temi ashiba agi, SS Power One plant kong S. Alam Group shilem 70 lir, iba plant ajanga environmental impact standards matonger aser iba plant ya nüburtem den mashishitepi yangluogo.

Bangladesh nung China nunger company temi sen intokba rongnung iba plant yaa tulutiba ka lir. 2016 küm tir Xi Jinping-i Bangladesh semdangba mapang iba maparen inyaktüba sangdonga liasü.

S Alam executive director Subrata Kumar Bhowmick-i, plant shilem 40 tembanga inyakogo aser iba tesem nung mapa inyaker 3,000 shi anioka lir, ta ashi.

Company ketdangsür anati ashiba agi, China nunger contractor temi mapa inyaktertem anioker.

Iran-i Natanz nuclear facility amaksang maitsü metetdaksü

Tehran, Rongchiii/April 17 (Agencies): Iran-i Honibarnü Natanz nuclear facility amakba dak sendakba nung temulung meleme bilemba nisung ka tenüng metetdaksüogo aser ashiba agi, lendong matalok tsüngda pa linük toktsür jena oadoker liasü.

State television-i temulung

meleme bilemsang ya arishi küm 43 tain Reza Karimi ta sangdongogo. State television-isa, Karimi indang passport mesükba noksa ka sayaogo aser pa ya Kashan yimti nung aso, ta metetdaksü.

Ajisüaka osang ajanga, Karimi kodaser Islamic Republic nung kanga kümdanga meita aliba facility kati itet, iba indang kecha osang magütsü.

Report ajangsa pa aputsü atema Interpol "red notice" mesükba osang ka sangdong. Pa aputsü atema tetuyuba agütsüba ya Interpol indang public-facing database nung mengutet. Kasa mapang nung Lyon, France nung amenoker aliba Interpol-ia telangzüba magütsü.

TV report ajanga ashiba agi, özüng kübok pa Iran-i meyipa anir arutsü atema inyakyim tenzükogo. Interpol "red notice" asütsü ta bilemba osang nung pa Spain, the United Arab Emirates, Kenya, Ethiopia, Qatar, Turkey, Uganda, Romania aser tanga linüktem sema senzüba sayuogo.

Maneni report ajangsa takdang ka nung centrifuge tem amenoka aliba aser Natanz facility nung tekümdangtsü malokja aliba sayuogo.

Deobarnü Natanz facility ya Israel-i amak asütsü ta temulung meleme bilemer aser iba ajanga linük ana tsüngda mangatettep tali adokogo.

Mexico nung Jila 14-i vaccine magizüker

Mexico city, Rongchiii/April 17 (Agencies): Mexico nung health ketdangsertemi Hokolbarnü ashiba agi, linük nung jila 2,600 shi rongnungi 14 nung vaccine agütsüba team nem coronavirus vaccine agütsüdahtsütsü memelar.

Assistant Health Secretary Hugo López-Gatell-i, jilatem ya Chiapas aser Oaxaca state nung timba lir, ta ashi.

Item lokti tem yagi kechiba vaccine magütsüdahtsür, iba indang pa osang tejangja magütsü, saka parnoki vaccine agütsü memulungba ya sobaliba aser tamangba yimsü dak sendaka alitsü, ta ashi.

López-Gatell-isa, vaccine magütsüdahtsütsü atema town council temi telemtetba agi ta ashiba den parnok telemtetba onoki akhümtsübur, ta ashi. Ketdangsertemi vaccine aginertem atema item jilatem meketa aliba jila balala nung scheme ka amenoktsü merangdar, ta pai ashi.

Mexico anüolen tip nung

aliba Indigenous municipalities nem nüjiso balaka agüja lir aser kar nungbo tang tashi political party tem mali mesera election magir, ajisüaka sobaliba yimden yimsüsüba dang benoka lir.

Zapatista telungpurtem amokbanger aliba Chiapas jilatem nungbo sorkar sentongtem magizüker, ajisüaka vaccine agizütsü memulungertem rongnung parnok densema ali mali aji mejangja.

Chiapas nung local media sangdong kar ajanga ashiba agi, lokti kari vaccine dak tamang maker mesera tashidak pokteta aliba kuli tejangja agütsütsü atema tashidak menar aikabo mali.

Mexico nung tang arishi küm 60 temapur, health care workers aser tesayurtem kar nem vaccine agütsüdar. Tang tashi nung Mexico nung vaccine million 13.5 agütsüogo, ajisüaka linük nung nütsünyongsük million 126 lir asünung ano aika nem magütsüjemi lir.

Johannesburg kübok mozüki kanung mi adok



Johannesburg kübok Charlotte Maxeke Hospital nung mi adokba mapang yaritepba noksa nung angur.

Johannesburg, Rongchiii/April 17 (Agencies): Johannesburg kübok Charlotte Maxeke Hospital nung aonungsangwa mi adokba sülen Honibarnü tashi nung shiranger 700 shi aninogo.

Mi lendong nung nisung asüba mesera yiruba osangbo kecha mali. Mi temsepogo, saka mozüki anogo tenet atema shibangogo, ta Gauteng province tekolakba David Makhura-i ashi.

Shiranger 670 yimti kübok tanga mozükitemi belenerogo, ta Makhura-i ashi.

Mi agi ki arongba ajanga Honibar anepdang mozüki third floor nung gari anendendak chirepogo.

Mibener rokeri aonung sangwaa mi temseptsü meranga liasü. Iba mi ya Hokolbar anepdang adok aser anüngdang tashi nungbo temsep, ajisüaka nikongtsütsü mi tanaben jangrushu aser aonung sangwaa arong.

Mi lendong nung mozüki kanga mejungi raksaogo, kong yipden 1,000 dak tema lir aser iba mozük ajanga Johannesburg yimti aser Gauteng province nem teyari agütsür. Charlotte Maxeke mozüki ya linük nung mozükitem rongnung tulutiba ka lir.

Kasa mapang nung iba mozüki ya Gauteng atema Covid-19 treatment center lir. Makhura-i ashiba agi, mi adokba mapang mozükidang Covid-19 agi shianger 13 (ana ICU aser 11 general ward) temang anepalua liasü. Parnok ajak tanga mozüki-i anirogo.

Mi ya surgical supplies takongtem bendena ayuba takdang ka nungi adok, ta Ketdangsürtemi metetdaksü.

Mibenertemi ashiba agi, mi ya medical supply tem milak madoki mokozi dang longa tanem tanem arongba ajanga jangrushu, ta Makhura-i ashi. Mi adokba bushitsüngdangtsü, ta paisa metetdaksü.



Buenos Aires, Argentina nung coronavirus tashidak prokshia aoba nokdangtsü atema sorkari school-i oa class agiba sota atatsü atema telemtetba agiba anema Ministry of Education kima longkak aitba mapang tetsür kati Spain oshi nung: "ni school nung angazükner" ta zülua amer nokdakba noksa nung angur.

Wokha nung Acoustic Club-i sentong ayongzüksü



Wokha, Rongchii/April 17, 2021: Honibarnü, Tourist Resort Area, Doyang nung TaFMA Advisor, Theja Meru-i jembiba yangi angur.

Wokha, Rongchii/April 17, 2021 (TYO): Acoustic Club, Wokha-i anogo ana musical, food aser fun fest sentong ayongzüksü terenemba lir.

Tourist Resort Area Doyang nungi Venue partner ama Rhyuka Yenjo den Task Force for Music & Arts (TaFMA) longjemer April 23 aser 24, 2021 nü Acoustic Club-i iba sentong ayongzüksü.

Anogo ana tashi ayonga agitsü aliba musical sentong nung, Wokha nungi local band 14 aser guest band kati shilem agitsü.

Honibarnü, Doyang Tourist Resort Area nung Advisor for TaFMA, Theja Meru-i, Nagaland nung Doyang ya tongtibat tesem ka lir aser iba musical sentong ajanga alima dang Naga lima sayutsü asoshi mezüing mera agir ama alitsü, ta ashi.

Rongsenkettsü nung ajungkettsütsü asoshi music festival aser musician temi shilem ka agir. Arts aser music naprongla onok atema brand ambassador lir, ta pai shisem.

Meru-i, Naga Musician atema TaFMA ajanga rongsen lenmang bushitsü maparen aser maongka agütsütsü asalentong lir. Tarutsü nung iba sentong takok nguyonga aotsü aser tanga music sentong ama rongsenkettsü nung den arts industry enloka aoba nung iba sentong yagi tongti shilem ka agitsü imlar, ta ashi.

Iba sentong takok ngua ayongzüksü nükla yur achaayangertem nem teyari agütsüba atema Event Manger, Nzanbemo Patton-i TaFMA team dang pelaba metetdaksü. Iba amala sabang ajanga musician tasentem kanga ajangzüksü, ta pai ashi.

Music wadang tsütsü lanurtem nem iba ama sentong ajanga sabang agütsüba asoshi, Patton-i Chief Minister danga pelaba shisem.

Patton-i ashiba agi, Sorkar ajanga agütsüba SOP ajak nung anidaka iba sentong ayonga agitsü.

Iba musical sentong ayongzüksü atema tesem meleba asoshi Project Director TaFMA, Dr. Hovithal Sothu-i Land Owner Union (LOU) Doyang dang pelaba metetdaksüogo; aser TaFMA Advisor nungi teyari agüja aser jangrabangraba ajanga iba sentong agitsü lenmang adoker, ta Sothu-i shisem.

Maneni, LOU Doyang President, Rhanbemo Odyuo-i, iba sentong agiba mapang Tourist Resort Area nung ango apuba, camping aser picnic tem nokdang, ta metetdaksü.

India nung Sony Bravia 32W830 Smart TV saya

Mumbai, Rongchii/April 17, 2021 (Agencies): Japan indang electronics yangluba company tetsüti - Sony-i India nung smart TV tasen ka sayaogo.

Sony Bravia 32W830 ta nüngja agütsüba smart TV nung Google indang Android TV ajanga tashi agütsür. Iba TV ya Google Assistant support asüba Android TV tilatiba alitsü, koba Sony ajanga agütsü.

Ano külen, shishilembadak 32-inch smart TV rongnung Bravia 32W830 ya tasaktiba asütsü aser iba TV jenjang sen 31,900 alitsü.

Iba TV nung Google Assistant ajanga user temi remote control mesüra TV den apet smart speaker ajanga voice

command agütsütettsü. TV nung Google Chromecast inoksema yanglutsüogo aser ibajagi compatible device ka ajanga video mesüra audio cast sütettsü.

Sony Bravia 32W830 ya HD-ready television ka lir, kong 1,366×768 pixels resolution angutsü aser shishilembadak kasa product tem den medemdangra, resolution tilaba alitsü.

Ajisüaka, Sony Bravia 32W830 specifications nung HDMI port ka ajanga 1080p resolution - 60Hz refresh rate tashi melena amshitettsü ta shia lir.

Sony-i ashiba agi, iba smart TV yagi HDR 10 aser HLG format densema HDR support


asütsü.

Iba TV nung Sony meyong X-Reality Pro picture processing technology aser X-Protection Pro inoka yanglutsüogo. Connectivity tsütsü reprangdangra, Sony Bravia 32W830 nung HDMI port 3, USB port 2, 3.5mm audio output ka, Wi-Fi aser Bluetooth 4.2 angutsü. TV nung 20W stereo speaker den Dobly Audio aser app den tanga data amshitsü atema 16GB internal storage angutsü.

Shishilembadak nüngtugu brand talisa Xiaomi, Samsung, LG, Vu aser Realme o OnePlus indang 32-inch smart TV den medemdangra, Sony 32W830 smart TV jenjang tasakba alitsü.

Pelaba Lemsateper

Aso:
14. 08. 1927



Asü:
01. 04. 2021

Temeimtiba tsurabür, asür J. **MANGYANGLULEN** (Chuchuyimlang), pa asüba anogo nungi kija, lokti aser tentet balala shirnokisa nübo, rongsen, shisatsü aser sarasadem agi yariogo, nenok ajak dang kanga pelaba lemsateper.

Nenok mapa tajung onoki kodanga mamatsü. Teyanglur Tsüngrem-i nenok ajak moajang ta ozü sarasadem.

- Temeim kinungtsü, chirnur, semchirtem aser kinungertem.



Dimapur, Rongchii/April 17, 2021: Fire Week 2021 shilem ama "Cycling for Fire Safety Awareness" omen kübok ayongba "Cyclothon" nung Honibar anogo shilem agirtem Changtongya ajangdang tangokba noksa ka yangi angur.

Sonu Sood dak Covid-19 putet



Sonu Sood (File photo)

Mumbai, Rongchii/April 17, 2021 (Agencies): Bollywood actor Sonu Sood dak coronavirus tashidak putet. Honibar anüngdang social media sabang ajanga Sonu-i iba osang lemsatepa liasü.

Twitter ajanga Sonu-i iba osang den külemi pa kidang quarantine süa mungdar, ta metetdaksü.

Hokolbar nikongdang, Dabangg nung tongti shilem agisang Sonu-i mapa tajung inyakba asoshi pa nem 'messiah' naroküm agüja tenünsang agütsüogo.

Tang, India nung Covid-19 tensa asadanga nübur dang kidang amungtsü aser tejak nembangba mask inoktsü asoshi pai mepishia liasü.

Taoba küm India nung Covid-19 wara adokba mapang nungi, Sonu Sood-i timtemer nem teyari agütsütsü asoshi anibelem arema inyaka arudar.

Tanga tesem nungi arua ayangertem pei talidaki yoktsü asoshi Sonu-i parnok

senzüsenbongtsü anepaluja liasü aser mozü malitet alir sensakertem atema mozütem anepalitsüogo.

Maneni, tanga sangdong ka ajanga angazükba agi, actor Summet Vyas aser designer Manish Malhotra naprongla dak coronavirus tashidak putet. India nung Covid-19 wara tanaben adoka Industry nung actor aser crew züngsem dam coronavirus putetba ajanga film aser television project tem nung timtem adokdaksüogo.

Hokolbarnü, actor Pawan Kalyan dak-a COVID-19 positive putet, ta otongdar sangdong ajanga metetdaksü.

Vakeel Saab star Pawan den külemi inyaker staff züngsem aser security personnel tem dak Covid-19 putetba sülen, anogo pezü lir pa dak iba tashidak puteter alitsü.

Kalyan indang tawa sayaba Telugu film tasen - Vakeel Saab ajanga box office nung takok tulu nguogo. Küm asem sülen, Vakeel Saab ya Pawan Kalyan indang mezüing film alitsü. Iba project ya Bollywood movie Pink tanaben Telugu oshi nung yangluba film ka alitsü aser Kalyan-i lawyer shilem agiogo. Pink nung Amitabh Bachchan-i tongti shilem agiba ajaki jangjaa lir.

Kalyan-i ano Telugu movie tasen ka tangok tenzüko. Iba project ya Malayalam film Ayyappanum Koshiyum nung ajemdaker yangludar. Film tasenba nung Rana Daggubati-i Pawan den screen nung mezüing shilem agiba angutsü.



All Ward Union Mokokchung Town kimen ki mesemtetba sentong ka April 17 nü takok ngua agir külen, AWUMT kimen Wb. R. Longritemjen Ao den AWUMT ketdangpurtem aser ward 18 nungi chairman & secretary-tem külemi tangokba noksa nung angur. Mokokchung, April 17, 2021

India nunger football asayar tejen Ahmed Hussain süogo



Bengaluru, Rongchii/April 17, 2021 (Agencies): Taoba mapang India football star aser nungtugu 1956 Melbourne Olympics squad nung shilem agisang, Ahmed Hussain Hokolbarnü iba akümüli nungi pilaogo.

Covid-19 tashidak agi Ahmed mapang tatsüka shirangba sülen iba timtem mekokteti pa süadok. Hussain arishi küm 85 liasü.

Hussain, shiba Mohammedan Sporting club indang captain inyakba den Hyderabad Sporting Club nung asayaogo, pa centre half' aser centre back' asayar takoktet ka liasü.

Pa kibong kümer sülen Garden City-i ao aser coach ka ama Sports Authority of India, South Centre nung aden. Ahmed-isa referee tsütsü jangrabangra inyak aser Stafford Cup densema football asayamung tulu nung ketdangsüa aruogo.

"Pa (Hussain) temulungjang nung timtem tilaka liasü aser küm ishika atema dementia agi kangshia liasü. Tesüiba anogo ishika tejakdang, pa tera manem liasü aser Covid-19 tashidak

putetba sülen, Mongolbar aonung pa mozüki anir ao. Tanep 9:30 ako meta pa süadok. Tanü anüngdang Mercy Angels (frontline workers tentet) teyari agia aser Covid-19 protocol ajak nung anidaka pa den asü pila sentong agiogo," ta Hussain'er jabaso Imtiaz Ahmed-i ashi.

Hussain-i pa kinungtsü Ayesha toktsür süogo. Tesüiba ita ishika tejakdang par jabaso tambosang Aijaz asü.

Taoba mapang, Karnataka State Football Association president AR Khaleel-i ashiba agi, 1950s aser 60s tetenzüklen Hussain ya India football team indang defender tajung ka liasü.

"1956 Olympics squad, kong onok jenjang pezububa nung tembang, iba squad nungi asayar ka süogo. India nungi defender tajungtiba rongnung Jarnail Singh ama Hussain-a asayar tajung ka liasü," ta Khaleel-i yimdangi aruba lemsatet.

Tawa, Khaleel arishi küm 90 jungogo.

"Pa kinungtsü Ayesha ya Vijaya Bank nung inyaka liasü aser ibajagi pa (Hussain) Bangalore-i aruadok. Iba sülen, pai West Germany nungi NIS diploma aser A-level diploma

bener SAI nung aden aser mapa nungi animesüngzük tashi coach ka ama inyak," ta Khaleel-i ashi.

Football putiotsü metetter, Dr SA Rahman-i, CIL densema asaya ka nung mangatetep adokba sülen Hussain-i quit referee mapa toktsü, ta ashi.

"Pai tzüzüng özüngtem rajema lir, saka nisung kari tebang agi kanga mejungi rarabangsentep aser iba sülen nungi pai kodanga referee mapa meinyaktsü ta ashi," ta Rahman-i shisem.

Hussain ya Hyderabad City College nung azüing aser 1956 küm Trivandrum nung Santosh Trophy akokba mapang pa den külem asayartem nungtugu aküm. Hyderabad aser India coach SA Rahim tawabangba kübok Hussain ya 'three-back defence system' nung asayar tongtibang ka aküm.

Melbourne Olympics temer sülen, Hussain-i mapang shia India squad nungi asaya liasü. 1958 Tokyo Asian Games team nunga pa dena asayaogo, kong third-place playoff nung Indonesia makokba sülen India team-i jenjang pezububa ngutet.

Asian Wrestling Championships: Bajrang-i silver angu

Almaty, Rongchii/April 17, 2021 (Agencies): Honibarnü, Asian Wrestling Championships nung India nunger wrestler Ravi Kumar Dahiya-i tanaben Asian Championship title ajangzükttet aser Bajrang Punia-i silver medal takok angu.

Kanga dang yongya ataba final nung Bajrang aser Japan nunger Takuto Otoguro na asaya liasü, saka tia makai Bajrang tekatsü yiruba ajanga asaya Tom nungi pa tukadok.

Bajrang-i, kü achji tekatsü nung timtem aliba tamajungba mekümdaktsüner, ta PTI dang ashi.

Pai ashiba agi, Korea nunger Yongseok Jeong den quarterfinal asayaba mapang tekatsü ashi tenzük. World Championship asayaba mapang nungi iba timtem adok aser Olympics atongtsü lia kangarabo timtem

magitsü asoshi coach temi kü dang ashi. Ibajagi asaya tom nungi tukadok.

65kg mezüing bout nung Bajrang-i ayong ayonga dang asayar Jeong den tera timtema asaya liasü.

Semi-final nung Bajrang-i Mongolia nunger Bilguun Sarmandakh tsükdakja final tongtet.

2018 World Championship title tetoktepba nung Bajrang-i makok aser taoba küm indang Asian Championship final nung Otoguro-i pa tsükdaktsü. Taküm-a 65kg tetoktepba nung pai Japan nunger Otoguro akoktsü teimla tulu nung asaya, saka tebilemba matalok.

Külem India nunger Ravi Dahiya-i 57kg freestyle tetoktepba nung India atema mezüing gold medal nguogo.

Kiren Rijiju dak COVID-19 putet

New Delhi, Rongchii/April 17, 2021 (Agencies): Honibarnü, Sports Minister Kiren Rijiju dak Covid-19 putet. Ajisüaka, pa dak iba tashidak temaitsü agi shirangba mali.

Arishi küm 49 Rijiju-i Twitter ajanga, "Covid-19 atema mapang shia tendanga arur sülen, tanü (Honibar) kü dak iba tashidak positive putetogo, ta lemsatet.

"Doctor temi teyuba nung anidakdar. Kümdangshitsü atema, tawa, kü den ajuruteper ajak dang pei sasa quarantine asütsü aser Covid-19 test agitsü asoshi mepishir. Tang tashi nungbo tashiita aser tajungba lir," ta pai ashi.

State chief minister Tirath

Singh Rawat, shiba tawa ang Covid-19 nungi taneptsü angu, Rijiju den sentong ka nung külemi shilem agia liasü.

Brehostibarnü, Rijiju den Surjeet Singh Deswal, director-general of Indo-Tibetan Border Police (ITBP)-i Uttarkashi district indang Nelong Valley semdanga liasü.

Saisapong dak alaka, tawa, Rijiju nem ministry of Ayurveda, Yoga & Naturopathy, Unani, Siddha and Homoeopathy (AYUSH) mapa abentsü asoshi lemezütsü.

Union Minister, Shripad Yesso Naik gari lendong ka ajurua mozüki nung amungtsüsa akümiba sülen, Rijiju-i iba mapa agizüker alitsü.

Mumbai Marathon asayamung anogo atsülangtsür

Mumbai, Rongchii/April 17, 2021 (Agencies): 17buba Mumbai Marathon, koba May 30, 2021 nü ayongzüktsü renemer liasü, Covid-19 wara tanaben sashia adokba asadangteta iba asayamung anogo atsülangtsüsa akümer, ta Honibarnü Marathon ayongertemi sangdong ka ajanga metetdaksü.

"Maharashtra Sorkar aser iba asayamung den külem sendaktepa alir Athletic tentettem den asüngdangyaba sülen, mapang lia iba Marathon atema anogo tasentem sangdongtsü," ta osangbener sangdong ka ajanga metetdaksü.

"Tang Covid-19 tensa asadangshi asalentong tajungtiba yanglutsü asoshi onoki inyaktsü. Taküm iba marathon sentong takok ngua agitetsüsa onoki akok tashi tapet mera ajak agia achaayangtsü," ta sangdong nung shia lir.

"Maharashtra aser külem sendaktepa alir ajaki iba asayamung takok ngua agitsü asoshi nungita arudar. Iba den külemi, marathon nung adener ajak (shilem agir aser achaayanger) iba tesashi wara nungi kümzüka yutsütsü

nükjidong yur parnoki sentong tem anepalutsü," ta Procam International indang Vivek Singh-i ashi.

India kübok tesem balala nung novel coronavirus adokba mapang, iba tesashi wara agi kongshir aliba State rongnung Maharashtra tamajungtiba asütsü.

"Anogo tanga ka nungang iba asayamung ayongtsü asoshi sentong renemding, state, national aser international athletic tentettem den longjemer anogo tetemjen ka lemtettsü atema onoki inyaktsü. Tongtibangsa, iba asayamung den sendaktepa alir ajak timtem kecha majurui takok ngua achaayangtsüsa onok tebilemba lir," ta pai shisem.

Küm shia Mumbai nung iba marathon asayamung January ita agir, saka Covid-19 tensa süngjema maoba ajanga May 30, 2021 nü asayatsü anogo shima liasü.

Maneni, Hokolbarnü, Mumbai nung nisung 8839 dak coronavirus tashidak tasen putetba osang angazükogo. Tang Mumbai nung iba tashidak puteter nisung lakh 5.6 kümogo, kong nisung 85,226 shi anepaludar," ta BMC sangdong ka ajanga metetdaksü.

ICC World T20 atema Pakistan cricket team nem visa agütsütsü



Pakistan Cricket team (File photo)

New Delhi, Rongchii/April 17, 2021 (Agencies): Taküm October ita ICC World T20 asayamung atema Babar Azam-i aniba Pakistan cricket team pur India-i arutsü asoshi timtem kecha majurutsü. Kidanger linük (India) nungi Pakistan cricket asayartem dang Sorkari visa melatsü terenemba lir.

Sangdong ka ajanga

angazükba agi, Pakistan asayartem nem sorkari visa agütsütsü teletmetba indang BCCI secretary Jay Shah-i Apex Council dang osang metetdaksüogo.

"Pakistan cricket team atema visa agütsütsü maparen achaayangdar. Ajisüaka, fans (Pakistan nungi terepranger) tem India-i arua iba asayamung reprangtsüsa

senzüsenbongtsü melatsü/ memelatsü atema osang tejangja ka metetdakja mali," ta Apex Council züngsemtemi ashi.

"Mapang lia item inyakyim atema asadangshia teletmetba agitsü. Ajisüaka, onoki iba maparen tajungtiba nung achaayangtsü ICC dang nangzükogo. Senden agiba mapang Secretary ajanga metetdakja liasü, ta züngsemtemi ashi.

Yimtenren tsütsü India aser Pakistan na tsüngda mangatetep aliba ajanga küm aika atema linük ana tsüngda bilateral series asayadanga mali.

Aruya aliba World T20 atema BCCI-i asaya tesem tuku tashi jangjatsüogo, kong Ahmedabad kübok Narendra Modi Stadium nung final asayatsü.

Iba asayamung atema tanga tesemtem ji Delhi, Mumbai, Chennai, Kolkata, Bangalore, Hyderabad, Dharamsala alitsü.

BILEMDANGANG

"Ochishia aser meranga inyaker takok angubaji jangratemtsüka lir."